

## ПОВЕСТЬ НИКОДИМА ТИПИКАРИСА СОЛОВЕЦКОГО О НЕКОЕМ ИНОКЕ

### ПОВЕСТЬ ДУШЕПОЛЕЗНА СТАРЦА НИКОДИМА СОЛОВЕЦКАГО МОНАСТЫРЯ О НЪКОЕМЪ ИНОКЪ

Повѣда намъ отецъ Никодимъ\* типикарисъ<sup>1</sup> о нъкоемъ братѣ,\* сице<sup>2</sup> глаголя: «Живущу ми, — рече, — во обители преподобных отецъ наших киновиархъ Зосимы и Саватия,\* иже близ суши понта<sup>3</sup> от акиана Соловецкаго отока<sup>4</sup>, и тамо пребывающу ми лѣта доволна и типикарийскую службу хранящу. В то время прииде нѣкий братъ в той же монастырь, юнъ сый лѣты, добръ возрастом, повѣда ми о себѣ повѣсть страшну, исполнь сущу ползы и умиления и слезам достойну, могущую слышащих удивити и устрашити, и во умиление привести. Самъ же со многими слезами, со въздыханьми же и рыданьми глаголя сице:

«Бысть, — рече, — в лѣта 7146 (1638) году при державѣ благочестиваго государя царя и великаго князя Михаила Феодоровича\* всеа Росии самодержцѣ. Сущу ми во обители Пресвятыя Живоначальныя Троицы Сергиева монастыря, близ суши царствующаго града Москвы. Тамо пребывающу ми во всякомъ небрежении о своем спасении, и свою всю жизнь злѣ провождаючи, и о душевномъ своемъ спасении не пекущуся, заповеди же Божия преступающу ми и во всякой нечистотѣ и в пьянствѣ пребывающу и в небрежении, о своем спасении не радяще, и иноческаго пребывания обѣщание забывшу и во всем прерѣвшу, и яко скоту невоздержно живушу. <sup>5</sup>Испроста рещи<sup>5</sup>: яже суть Богом любима, сих отвращахся, а яже Богъ ненавидитъ, сия любима быша мнѣ, и сими душу свою помрачах — и тако пребывающу ми. Абие<sup>6</sup> посылает ми ся жезлъ наказания за грѣхи моя, внезапно бо злѣ пострадах и мзду по дѣлом моим восприях. И аще<sup>7</sup> не Господь Богъ помогль бы ми, вмалѣ<sup>8</sup> вселилася бы во ад душа моя,\* понеже<sup>9</sup> той, яко чадолубивый отецъ, наказует, но обаче<sup>10</sup> с милостию, по реченному: „Накажет мя праведникъ милостию и обличитъ мя, не хочет бо той смерти грѣшному, но яко еже обратитися и живу быти ему, и хочет всѣм спаситися и в разум истинный приити”.\*

<sup>1</sup> уставщик; <sup>2</sup> так; <sup>3</sup> моря; <sup>4</sup> острова; <sup>5—5</sup> попросту сказать; <sup>6</sup> внезапно, вдруг; <sup>7</sup> если; <sup>8</sup> вскоре; <sup>9</sup> потому что; <sup>10</sup> однако.

И тако ми, — рече, — нѣкогда во едину от ношей во дни пентикостиа, близ праздника Святаго Духа сошествия\* во мнозѣ пьянствѣ пребывающу ми, по реченному: „Спящии бо в ноши спят, и упивающиися в ноши упиваются”.\* Приспѣ время спати и от пианства душегубителнаго престати. Обычай же имѣх от юности моя сие: егда хотящу ми спати, тогда вся чюства своя рукою своею не забывах крестити. Сие ми и тогда такожде сотворшу и уснувшу, и не вѣмъ<sup>1</sup>, колико<sup>2</sup> спавшу. И убудивъшу ми ся от сна, и зрящу: внезапно растворившася двери храмины, в нейже лежах на одрѣ грѣховнѣмъ лѣности моя, и сосуды грѣховныя окрестъ мене на ложи моем со мною быша. И се зрю идущих к себѣ во храмину множество темнообразных ефиопъ, сирѣчь<sup>3</sup> бѣсовъ, во одеждах худых, синих и червленых, со многою яростию, с воплемъ и кричаниемъ, и безчинныя гласы испущающе, и страшаше мя, и яко звѣрие дивии<sup>4</sup> внезапно хотяще мя поглотити. Тогда нападе на мя боязнь, и страх, и трепет, и ужасъ объять мя.\* Гласъ же кричания ихъ сиевъ бысть: „Глаголи, черноризче: «Ваш есмь!»” Овии<sup>5</sup> же глаголаху: „Отчайся! Яко уже нѣсть ти спасения, понеже нашъ еси, нам предан”. Инии же, страшаше, вопияху: „Аще сего не сотвориши повелѣнная нами и *не* отчаешися, да вѣси, яко злою мукою погубим тя и скоро умреша в руках наших. Уже бо лѣта твоя скончашася, и <sup>6</sup>время исчезе живота твоего<sup>6</sup>”. Аз же яко от сна воспрянув и страх весь отвергъ, начать глаголати к ним: „У Бога милость велика, Божий есмь аз, а не ваш, якоже вы глаголете. Не отчаюся его милости, понеже вѣм, яко щедроты его на всѣх дѣлах его”.\*

Единъ же от них, яко князь над ними, повелѣваше им, глаголя: „Что стоите праздни? Поженѣте<sup>7</sup> и имѣте<sup>8</sup> его”.\* И внезапно все множество их устремившася и нападоша на мя, <sup>9</sup>во еже<sup>9</sup> разсторгнути мя, и удавити, и погубити, и снѣдь своей злобѣ сотворити, и фиаль<sup>10</sup> горести своя на мя излити.\* И приступиша ко главѣ моей и к ногама, яко пчелы сот обыдоша<sup>11</sup> мя. Аз же именем Господним противляхся им.\* Мнимому же князю их бѣсовскому повелѣвающу имъ, онѣм же к нему отвѣщающим и глаголющим: „Невозможно есть нам со главы его дѣйствовати и сокрушити его крестнаго ради<sup>12</sup> бывшаго на нем знамения и глаголанія ради стиха «О тебѣ радуется»”.\* И глагола им князь их мнимый: „Возмите свиту его, снизу и с ног его подидите нань<sup>13</sup> и сокрушите его”. Они же абие, яко звѣрие, устрѣмишася со многою яростию, и нападоша на мя немилостивно, и тако подидоша под ребра моя. И наполнися их чрево мое и пазухи<sup>14</sup>. И начаша мя мучити злѣ, и прегигающе с чрева на хребет, якоже и кольцем. И яко огонь воспалиша во внутреннихъ моихъ болѣзнию лютою. Аз же от сего велими<sup>15</sup> изнемогах, и возжадахся пити, и возбудих близ мене спящихъ отроков. Они же, видяще мя тако страждуща, и болѣзненно вопиюща, и пити просяща, зѣло<sup>16</sup>

<sup>1</sup> не знаю; <sup>2</sup> сколько; <sup>3</sup> то есть; <sup>4</sup> дикие; <sup>5</sup> другие; <sup>6–6</sup> время жизни твоей истекло; <sup>7</sup> преследуйте; <sup>8</sup> схватите; <sup>9–9</sup> чтобы; <sup>10</sup> чашу; <sup>11</sup> окружили; <sup>12</sup> по причине; <sup>13</sup> на него; <sup>14</sup> грудь, бока; <sup>15</sup> очень; <sup>16</sup> очень.

устрашишася и принесоша ми воды пити. Аз же испих чашу едину и абие изbleвах вся брашна и пития ис чрева моего, настоящая и прежнее, устнама и низом. И от зѣлнаго<sup>1</sup> огненнаго зазжения иже во чревѣ моем зѣло изнемогающе ми. И паки возжадахся, и испих вторую чашу воды, и такожде изbleвах, якоже и первую, з брашном и питием. Испих же и третью чашу воды: изыде из мене пиемая вода усты и низом чиста, без брашна и пития. И абие <sup>2</sup>возмогахъ мало<sup>2</sup>, и устрабихся<sup>3</sup> от немощи моея, и легчае ми бысть. И свиту свою измѣних, и в чистую облекохся, и благодарих Бога, избавльшаго мя от врагов моих. И мнѣх<sup>4</sup> имѣти миръ и утверждение души моей.

И во второй же день внезапу нападе на мя всегубительство.\* Паки<sup>5</sup> по прежнему образу приидоша множество бѣсовъ, <sup>6</sup>стужающе ми<sup>6</sup>, кричаще, вопиюще и глаголюще: „Отчайся и глаголи: «Вашъ есмь». Аще сего не сотвориши и не послушаеши нас, злою смертию уморим тя”. Аз же глагола к ним: „Уповаю на щедроты Божия и не отчаюся милости его. Васъ же не послушаю, погубити мя хотящих”. Они же, слышавше, <sup>7</sup>мало усумнѣшася<sup>7</sup>, отидоша, не мучивше мене, точию<sup>8</sup> се глаголющу ми с поношением и страшаще: „Свиту переменяи еси, и крестишися, и стихи глаголеши, и на книги надѣешися, и на старца своего уповаеши, а душу и тѣло свое *нечисто* имѣеши. Не очиститъ тебе чистая свита твоя, и не помогутъ тебѣ образы и книги твои, старецъ твой не избавитъ тя от рукъ наших. И ты мнишися тѣмъ очиститися, избыти от нас? Но сотворимъ тебѣ, якоже хощем”.

Имѣхъ же азъ стара наставника своего, древня мужа, и добра, и зѣло искусна во иноческихъ исправленияхъ. И прихождахъ к нему правило совершати, рекше каноны и часы пѣти, и у него благословение и прощение приимахъ, отхождахъ во свою службу, свойствѣннѣйше<sup>9</sup> же реши: отхождахъ на погубление души своея и на дѣлание беззакония. И в то время, в неже азъ безъ своего старца пострадахъ, и старца наставника моего не бысть тогда в монастырѣ, отшел бо бѣше во царствующий градъ Москву потреб ради монастырскихъ. В то же время азъ безъ своего наставника, *аки овца*, не имущая пастыря, заблудихъ от пути истиннаго и к путемъ нечестия уклонихся. Правило свое все презрѣхъ и по обычаю своему иноческому ничтоже совершахъ — и сего ради злѣ пострадахъ <sup>10</sup>от лица моего<sup>10</sup>. Врази мои совѣтъ зол совѣщаша на мя, ощутиша бо мя безъ наставника моего и кромѣ<sup>11</sup> правила благихъ дѣлъ пребывающа, и в нечистотѣ и пьянствѣ живуша. Глаголюща к себѣ челоуѣкоубийцы: „Нынѣ обрѣтохомъ время благопотребно дѣйству нашему: дондеже<sup>12</sup> безъ правила и в нечистомъ житии и пьянствѣ пребываетъ, приидемъ и тако злѣ умучимъ и уморимъ его, якоже хощем”.

<sup>1</sup> сильного; <sup>2—2</sup> немного укрепился; <sup>3</sup> исцелился; <sup>4</sup> полагал, надеялся; <sup>5</sup> опять; <sup>6—6</sup> нападающая на меня, досаждающая мне; <sup>7—7</sup> несколько усомнились, устрашились; <sup>8</sup> только; <sup>9</sup> правильнее; <sup>10—10</sup> по собственной вине; <sup>11</sup> без; <sup>12</sup> пока.

В третий же день и в третий час дня по мучениих перваго дня лежащу ми в нѣкоей храминѣ единому, изнемогающу зѣло. И абие забывшу ми ся и бывшу яко во иступлении: <sup>1</sup>зрю свой живот яко на двѣ части раздѣлен<sup>1</sup>. И внезапу яко врата разтворишася, и мене яко за руку ятъ нѣкто и исторгнувъ из вратъ внѣ, и паки врата затворишася. И обрѣтохся нѣгдѣ, яко на зеленѣ травѣ стою, а тѣло свое зрю на земли лежащее пред собою. И прежде удивихся сему и размышляя в себѣ: како одинаго себе положена сугуба<sup>2</sup> суца зрю и раздѣльна? И в недоумѣнии о семъ бысть. Потом же зѣло ужасеся, и нападе на мя страхъ и трепет. И се внезапно явишася окрестъ мене множество бѣсовъ, полѣкъ велик зѣло. Аз же сугубо<sup>3</sup> убояхся и вострепетах, видя ихъ звѣрски устремившихся на мя. И абие все множество их обступивше мя и удержаша мя крѣпко, по реченному: „Врази мои душу мою удержаша, уста их глаголаша гордыню, изгонящии мя нынѣ обыдоша мя”.\* И начаша глаголати мнѣ с поношением: „Гдѣ суть Богъ твой?”\* Се день, егоже чаяхом, и час, егоже многа лѣта ждахомъ: нынѣ в руки наша пришел еси и в сѣти наша впал еси”. И тако врази мои рѣша мнѣ злая: „Се нынѣ уже умерлъ еси, и погибе имя *твое* от земля живыхъ”.\* Держаше и душу мою и вкупѣ глаголюще: „Нынѣ уже нѣсть ему спасения о Бозѣ его, Богъ оставил его. Поженѣте и имѣте его, яко нѣсть избавляяй его”.\* И бяху ликующе, веселящася и радующася о грѣшнѣй души моей, яко обрѣтоша сю корысть многу. И тако на мя шептаху вси врази мои, на мя помышляху злая и глаголюще: „Сердце его собра беззаконие ему”.\* И начаша приносить свитки, в нихже писана суть грѣховная дѣла моя от юности моя. И развивающе их, показующе мнѣ, обличающе душу мою, и сотвориша, якоже восхотѣша. Сия же имъ творящим, и веселящимся, и душу мою держащим, и внезапно друг ко другу шептати начаша, и глаголюще: „Михаил\* грядет!” Сами же устрашишася, побѣгоша и невидими быша, а мене одинаго оставиша на том же мѣсте, идѣже держаша.

Аз же сия от них слышах, яко Михаил грядет и яко Михаилом нарицают, и не вѣдѣх, кто есть. И се абие архистратиг силы Господня Михаил прииде и яко свѣтъ блистаяся, солнечныя лучи испущая, и глагола ко мнѣ: „Послѣдствуй ми”. И тако поиде на небеса выспрь. Аз же вослѣдъ его радованною ногою идях безтрудно, яко вѣтром носимъ. Егда же идох на небо, и аз припадох к нему, поклонихся на ногу его и глагола ему: „Господи мой, великий архистратиге Божий! За что тако благодѣлствуеши мя и руководиуеши раба твоего грѣшнаго? Аз бо к тебѣ не сотворих ни одинаго блага, точию се едино помню: написах твой канонъ — и сей за пѣнязь\* отдах”. Он же рече ми: „Аз ни одинаго от чelовѣкъ требую к себѣ приношения, точию повелѣние Творца нашего совершаю. Порученно бо ми от Бога всѣх крещеных душа к нему водити на поклонение и объявляти вся вѣдущему по повелѣнию его”. И доидох до облакъ, облацы же пред нимъ раступахуся. И доидохом до вод, якоже выше облакъ, и до тверди ле-

<sup>1—1</sup> вижу, ощущаю себя разделенным на две части; <sup>2</sup> разделенного надвое; <sup>3</sup> еще больше.

деновитой. И видѣх инья облаки, красны зѣло, яко огненовидны. И потом доидохомъ до небесъ, яже выше вод. Твердь же и воды и небеса разступяхуся пред нимъ якоже улицу выспрь. И видѣхъ тамо свѣтъ неизреченный. И рече ми архистратигъ Божий Михаилъ: „Стани, не достоин бо еси тамо итти”. Аз же стах. И рече мнѣ: „Поклонися престолу величества Божия”. Азъ же прекрестихся и поклонихся, якоже повелѣ ми, ко свѣту оному, егоже видѣхъ на небесѣх.

И паки архистратигъ обрати лице свое к земли и сниде на землю низу, аз же вослѣдъ его идях. И абие разступися земля, и внидохом в ню. И доидохом до воды, иже под землею, и вода такоже пред нимъ раступися. Под водою же приидохом в мѣста темная нѣкая зѣло, в немже мнѣхъ зрѣти свѣтъ точию от свѣтлости архангеловы. И видѣхъ тамо якоже улицы нѣкия и полаты. И в нѣкую во едину от них внидохом, яко в проходную полату, по обѣма странама имущу окна. На едину же от окон възрѣ очима своима Михаилъ. И абие разстворися окно, изыде из него огонь горѣ<sup>1</sup> пламенем, яко гром страшен зѣло. И глагола ми архангелъ Михаилъ: „Се есть мѣсто, идѣже повелѣ быти тебѣ праведный Судия до втораго его пришествия”. Аз же, сия услышав от него, зѣло вострепетах, и убояхся, и страхом великим объятъ быв, припадох к ногама его и глагола ему: „Господи мой, великий архистратиже Михаиле! Возможно ли есть грѣшному покаяться и избыти от сея огненныя муки?” Он же, сия слышав, умолча, и отвратися лицом своим от мене, и возведъ очи свои выспрь. И абие разступися вода и земля горѣ, раступишися же облацы, и твердь, и воды яже выспрь, и небеса якоже трубою вверхъ. Архангелъ же горѣ зря. Также и аз възрѣвъ и видѣхъ вверхъ яко трубою же даже до онога свѣта, егоже прежде на небеси видѣхъ, не слышах же его глаголюща ничтоже. И паки обрати лице свое ко мнѣ и глагола ми: „Милостивъ ти бысть праведный Судия. И се дал тебѣ сохранить три заповѣди сиа: иже престани от нечистоты и не пити вина и табака. Аще сия сохраниши, избавленъ будеши от муки сея”. Аз же с радостию великою и с клятвою обѣщахся сохранить и поклонихся до земли. Он же глагола ми: „Послѣдствуй ми”. И поидохомъ от тоя полаты. И се на другой странѣ тоя улицы — яко полата же, и окна имущи. Михаил же възрѣвъ на едино от них окно, излился из него смола со огнемъ. И ничтоже ми архангелъ глагола, проидохом мимо якоже улицу. И разступися вода и земля, и изыдохом по тому же пути вверхъ, имже прежде в землю снидохом, и тако изыдохом на землю.

И внезапноу обрѣтохомся на мѣсте, идѣже тѣло мое грѣшное лежаше. И глагола ми архангелъ: „Сохраниши ли заповѣди, ихже рекох?” Аз же паки глаголах ему: „Ей, господи мой, сохраню, точию помилуй мя”. И нача его молити и глагола ему сиче: „Велика ми есть вѣра, господи мой, во обѣщании моем быти, в Соловецком монастырѣ: да идѣже власы своя остригох, тамо бы и кости своя положити”. Он же рече: „Просися у старца, наставника своего. И аще отпу-

---

<sup>1</sup> вверх.

стит тя, мощно ти есть. А нынѣ, аще хоцещи, можещи, тамо шед, помолитися и паки возвратитися и здѣ быти”. Аз же отвѣщах: „Ей, господи мой, желаю того и тамо итти помолитися”. И се внезапно обрѣтесе нѣкто зовомый Елисѣй,\* иже есть в царствующем градѣ Москвѣ странствуя Христа ради ходил. И сего позвал архангелъ и глагола ему: „Проводи сего до Соловецкаго монастыря помолитися тамо и паки возвратися сѣмо<sup>1</sup>”. И абие, не вѣмъ како, обрѣтохся в Соловецком монастырѣ со преждереченным Елисѣемъ, и у гробовъ чудотворцовых быхом и помолихомся, якоже лѣпо<sup>2</sup> и по чину. Елисѣй же он и во церковь Спасову\* внидѣ и благословение прият. Аз же не смѣхъ дерзнути еже в церковь Спасову внити — сего ради, чтобы мене не познали, но стоях во церкви преподобных.\* И, тако помолившеся, не вѣмы како, в мегновении ока обрѣтохомся во граде Костромѣ, в немже мати моя живяше. И с нею видѣхся, еще бо тогда жива бяше.

Идущим же намъ от града того путемъ, иже к Москвѣ лежащим, и внезапно срѣте<sup>3</sup> нас видѣ нѣкий бѣсовескъ, женска обличия имущи, простовласы и без пояса. Ошибѣ<sup>4</sup> же ея за нею бысть на воздухъ выспрь, яко круг великъ зѣло, всякими бесовскими мечты<sup>5</sup> испещрен. Сама же вопиеть, велми кричаще, яко обидима или досаждаема от кого. Глас же ея слышашеся к нам сицевъ: „Согнаша сестру мою с Москвы, но обаче не по мнозѣ времени и всѣ будем к Москвѣ”. И мнѣ мнится, яко се есть зовомая кикимора,\* иже бысть на Москвѣ не в давных временах. И тако оно бѣсовское мечтание зайде от очию нашею, мы же своим путем идохом.

И внезапно обрѣтохомся у тѣла моего, Елисѣй же от мене невидим бысть. И видѣхъ архангела Михаила стояща, и зрях, яко врата растворишася. И глагола ми архангелъ: „Поиди во врата сия”. Аз внидох и, не вѣмъ како, обрѣтохся в тѣле моемъ. И возведь очи мои, яко от сна возбнувъ<sup>6</sup>, и видѣхъ старца нѣкоего сѣдяща с кадиломъ у тѣла моего. И рече ми старецъ: „Мы вси видѣхом, яко мертвъ был еси с полчася, и тѣло твое осязахом, и свѣщу ко устам твоимъ приносихом <sup>7</sup>тонкаго ради дыхания<sup>7</sup> твоего. Отнюдь<sup>8</sup> без дыхания лежал еси — сего ради и кадихом тя. И како нынѣ ожил еси, не вѣмъ, Богъ вѣсть единъ”. Аз же о сем не повѣдах ему ничтоже. И потом зѣло изнемогахъ болѣзнию лютою, десять дней не могох брашна вкусити. Аще что и покушахся вкусити, но утроба не принимаше. И тако помалу едва устрахихся от немощи во многи дни и оздравих благодатию Христовою. И пребых во обители Живоначалныя Троицы до Великия четыредесятницы.\* Потом посланъ бых от настоятеля обители тоя в монастырьское село и тамо лѣто едино пребых. И забых испытующаго сердца и утробы<sup>9</sup>, праведно истязующаго тайная, тамо пребывая, по реченному: муринь<sup>10</sup> не обеляшеся, и ракъ прямо ходити не научашеся. Наступих бо на тимѣние<sup>11</sup>

<sup>1</sup> сюда; <sup>2</sup> дѣлжно; <sup>3</sup> встретил; <sup>4</sup> хвост (воздушный след?); <sup>5</sup> призраками, наваждениями; <sup>6</sup> пробудившись; <sup>7–7</sup> чтобы установить, есть ли дыхание; <sup>8</sup> совсем; <sup>9</sup> ум, мысли; <sup>10</sup> эфиоп, негр; <sup>11</sup> грязь.

грѣховное, избодох ноги моя душевныя, и благия пути погладих<sup>1</sup>, и правыя стезя порастих былием лѣностнымъ, и яко в безлунной нощи кривыми стопами жизнь мою измѣрихъ — и сими душу мою помрачих, и в покое тѣлѣснем и во всяком сладострастии живях. И что архангелъ три заповѣди сохранити мнѣ повелѣ, и тѣ всѣ преступихъ. И паки во обитель приидохъ и едино лѣто в ней пребых. И паки послан бысть на службу в другую монастырьскую весь и тамо такожде по прежнему обычаю вся притяжах, яже ненавидит Богъ.

В то же время бысть Божие посещение на люди: прииде бо язва смертоносная, глаголемая пострѣль. Язва же та не на долгое время простресе, но обаче кого постреляше, того в третий день и гробу предаше. В то же время ять бых и аз тою же язвою и в лицѣ устрѣленъ наказаниемъ Божиимъ. Носъ мой и лицѣ все опухло бяше, и очи воглубившеся и невидими быша, покрывшася кожею иже со главы, яко мѣхомъ, даже и до носа. И отнюдь<sup>2</sup> страшно видѣние бысть зрящимъ на мя. Объятъ же мя страх велий, и вниде трепеть в кости моя,\* во мнѣ смятеся крѣпость моя, и <sup>3</sup>исчезох о обличении моемъ о беззаконных моих<sup>3</sup>.\* И помышлях в себѣ, яко зол душа моя наполнися, и живот мой аду приближихся,\* и яко страшно есть еже впасти в руцѣ Бога живаго.\* И помышлях в себѣ виновна быти таковыя язвы грѣховъ ради моих и преступления ради заповѣдей оных, ихже архангелъ мнѣ рекъ сохранити и не соблюдохъ. И сего ради вмалѣ<sup>4</sup> не отчаяхся спасения своего. Обаче уповаю на милость Божию,\* вѣде, яко милостивъ и щедръ\* есть, дерзнух поискати своей немощи во умѣ, приемъ пророческое слово, глаголюще: „Поражю и аз исцѣлю”.\* И паки глаголет Господь: „Во гнѣвѣ же моем поразих его и за милость мою исцѣлихъ ѿ”.\* И тако язвою тою лютою люди уязвляеми, скорбяще зѣло и умирающе мнози.

И внезапно исцѣление обрѣтше своим болѣзнемъ сицевымъ образомъ. Село есть глаголемая Нерехта, отстоит от града Костромы тридесять поприщъ.\* В том селѣ есть монастырь девический, и в том монастырь во церкви поставлена чудотворная икона Пресвятыя Владычицы нашея Богородицы нареченныя Владимирския.\* К той тогда притекаху людие мнози и яко от источника приснотекущаго<sup>5</sup> здравие почерпающе, исцѣление приемлюще болѣзнемъ своим, влекущесе прихождаху и скачюще отхождаху в дома своя, радуещесе и славяще Христа Бога и Пречистую его Матерь. Слышав же и аз сия неизреченная чудеса, творимая Богоматерию, и повелѣ себе тамо вести, негли<sup>6</sup> и аз, грѣшный, милостию Богоматере отраду получю своя болѣзни и живъ буду. И яко приидохъ во церковь, идѣже чудотворная икона Богоматере, и по обычаю молебная пѣния соверших и помолихся Богоматери с вѣрою по силѣ своей, <sup>7</sup>елико мощно<sup>7</sup>. Оле силы твоя, Христе Царю и Богоматере твоя! И якоже окропихъ священной водою, и абие милостию Божиею и молитвами Пречистыя Богородицы, христи-

<sup>1</sup> здесь: оставил; <sup>2</sup> очень; <sup>3—3</sup> погиб в обличении моих беззаконий; <sup>4</sup> едва; <sup>5</sup> неиссякаемого; <sup>6</sup> может быть; <sup>7—7</sup> насколько возможно.

янския теплыя заступницы и скорыя помощницы, весь здоровъ и цѣль бых, яко николиже болѣхъ, ни слѣда почюх<sup>1</sup> немощи своея. Идѣже умножися грѣхъ, ту преизбыточествова благодать.\* И благодарих Господа Бога, разорителя ада и побѣдителя смерти, и спасшаго от толиких<sup>2</sup> смертоносных бѣдъ и погубления молитвами Матере своея Пресвятыя Богородицы. И помышлях в себѣ, яко ждать мя Господь Богъ на покаяние, и гдѣ ключимо<sup>3</sup> есть мнѣ со Давыдом глаголати: „Кто Богъ велий, яко Богъ нашъ! Ты еси Богъ нашъ, творяй чюдеса един.\* Слава тебѣ, Боже мой! Наказал<sup>4</sup> мя еси от юности моя, и донынѣ возвѣщу чюдеса твоя и даже до старости и матерства<sup>5</sup>. Боже, кто подобен тебѣ? Елики<sup>6</sup> явил ми еси скорби многи и злы, и обращъ<sup>7</sup> оживил мя еси, и от бѣзднъ земли возведе мя. Умножил еси на мнѣ величествіе твое, и обращъ утѣшил мя еси, и от бѣзднъ грѣховных паки возвелъ мя еси”.\*

И от того времяни начах в чюство приходити о согрѣшениихъ своих. И размышлях в себѣ, глаголя сиче, яко сия вся пострадах грѣх ради моих, раждателенъ бо есть грѣхъ казни и смерти. И во всемъ себе зазрѣхъ<sup>8</sup> и сердечныма очима к Богу възрѣвъ, ему же слава нынѣ и присно и во вѣки вѣков. Аминь».

---

<sup>1</sup> почувствовал; <sup>2</sup> стольких; <sup>3</sup> надлежит; <sup>4</sup> наставил; <sup>5</sup> почтенной старости; <sup>6</sup> какие; <sup>7</sup> обратив; <sup>8</sup> укорил.